

# Krvava nedjelja: U Siriji 66 poginulih

29 Jan 2012 Izmijenjeno 21:02 CET

**Ban Ki-moon pozvao predsjednika Bashara al-Assada da zaustavi krvoproliće**



Sirijska vojska: Od sredine marta prošle godine kada su počeli antivladini nemiri, život izgubilo više od 5.400 ljudi [AFP/Getty Images]

U sukobima vladinih snaga sa demonstrantima i pobunjenicima u Siriji je u nedjelju poginulo najmanje 66 ljudi, od toga 26 civila, a generalni sekretar Ujedinjenih naroda Ban Ki-moon pozvao je predsjednika Bashara al-Assada da zaustavi krvoproliće, javile su agencije. "On prije svega odmah mora da zaustavi krvoproliće", rekao je Ban novinarima i dodao da sirijske vođe treba da preduzmu odlučne korake da se obustavi nasilje. "Sve vrste nasilja moraju da budu zaustavljene", rekao je Ban u Adis Abebi gdje je govorio na otvaranju samita Afričke unije.

## 'Velika odgovornost'

Govoreći direktno o Assadu, generalni sekretar je kazao da sirijski predsjednik ima "veliku odgovornost da riješi situaciju i angažira se u političkom dijalogu".

Prema podacima Sirijske organizacije za ljudska prava, na koje se poziva agencije AFP, u Siriji je od utorka pa do nedjelje poginulo najmanje 232 ljudi, od toga 147 civila. Prema podacima UN, u toj zemlji je od sredine marta prošle godine kada su počeli antivladini nemiri, život izgubilo više od 5.400 ljudi. Sirijska organizacija za ljudska prava saopćila je da je u nedjelju širom zemlje poginulo najmanje 66 ljudi, među njima 26 vojnika, pet ostalih pripadnika sigurnosnih snaga, devet vojnih dezertera, u sukobima vlasti sa demonstrantima i pobunjenicima.

## Ubijeno dijete

Snage sigurnosti, prema tom izvoru, ubile su osam ljudi, među njima jedno devetogodišnje dijete, u nemirnom regionu Homs u centralnoj Siriji a još pet u sjeverozapadnom regionu Idlib. Među ubijenima je i šest civila u oblasti glavnog grada Damaska. U tri odvojena napada, poginulo je 26 sirijskih vojnika u Idlibu i Damasku. U borbama sirijske vojske i dezertera u mjestu Guta, 10 kilometara od Damaska, u subotu je ubijeno 17 ljudi - 11 vojnika i šest civila, objavila je ta sirijska organizacija a prenio AFP.

Izvor: Al Jazeera